

Nd.

129. Frumvarp til laga

um breyting á lögum nr. 66 17. júlí 1946, um atvinnu við siglingar á íslenzkum skipum.

Frá sjávarútvegsnefnd.

1. gr.

Fyrri málsl. b-liðar 8. gr. laganna orðist svo: Hefur eftir 16 ára aldur verið 36 mánuði háseti á skipi og af þeim tíma að minnsta kosti 18 mánuði háseti á skipi yfir 20 rúmlestir.

2. gr.

Í stað „60“ í síðari málsl. b-liðar sömu lagagr. komi: 30.

3. gr.

Lög þessi öðlast gildi þegar í stað. Jafnframt eru úr gildi fallin lög nr. 43 7. maí 1946, um breyting á lögum nr. 68 12. apríl 1945, um atvinnu við siglingar á íslenzkum skipum.

Greinar gerð.

Frumv. þetta er flutt samkv. beiðni skólastjóra Sjómannaskólans. Rökstuðningur fyrir frumvarpinu felst í bréfi hans, sem hér er að meginnefni prentað sem fylgiskjal.

Fylgiskjal.

STÝRIMANNASKÓLINN

Reykjavík, 11. nóvember 1946.

Á Alþingi fyrri hluta þessa árs var gerð breyting á b-lið 8. gr. laganna um atvinnu við siglingar á þann veg, að mönnum var gert að skyldu að hafa verið hásetar í 36 mánuði á skipum 30 rúml. eða stærri til að geta öðlast hið meira stýrimannsskirteini á fiskiskipi. Áður var þessi hásetatími sem kunnugt er einnig 36 mánuðir og af þeim tíma a. m. k. 18 mánuðir á skipi yfir 60 rúml., en 18 mánuðir máttu vera á minni skipum, þ. e. í skipum yfir 6 rúml.

Þessi breyting hefur leitt til þess, að nú ber lögum samkvæmt að neita um skólavist þeim mönnum, sem ekki hafa a. m. k. 24 mánaða hásetatíma á skipum 30 rúml. eða stærri — nema þeir hafi áður verið yfirmenn samkv. síðari málsg. þessa töluliðar —, þar á meðal mönnum, sem hefðu komið í skólan fyrir ári síðan, og má búast við, að svo verði enn um sinn að lögunum óbreyttum. Þá má og búast við, að þeir, sem aetla sér að nema siglingafræði, hætti alveg að sigla á hinum minni skipum, eigi þeir á öðru völ, þar sem þeir sjá fram á, að þeim verður gagnslaus sá siglingatími, bæði til inngöngu í Stýrimannaskólan og við öflun réttinda að námi loknu.

Áðurnefnd breyting á lögunum var gerð að tilhlutun Farmanna- og fiskimannasambands Íslands, með það fyrir augum að fá afnumið ákvæðið um hásetatíma á 60 rúml. skipum. Það er þá einnig meðfram fyrir tilmæli sambandsins, sem ég leyfi mér að senda háttv. sjávarútvegsnefnd eftirsarandi breytingartillögu, svo að úr áðurnefndum mistökum verði hætt.

F. V. Ólafsson.

Til sjávarútvegsnefndar neðri deildar Alþingis.